

Eksport kayu tidak terjejas dengan tuduhan NGO

by Saibi Gi. Posted on March 23, 2011, Wednesday



HIJAU: Awang Tengah menyiram pokok ubah atau nama saintifiknya, Syzygium Campanalatum, di Taman Negara Similajau pada majlis tersebut. Turut kelihatan, (dari kiri) Len Talif, Naroden, Sarudu, Dr Rundi dan Ismail.

Sarawak jaga alam sekitar dengan pengurusan lestari hutan yang diyakini ITTO, kata Awang Tengah

BINTULU: Dagangan produk perकayuan Sarawak ke pasaran antarabangsa tidak terjejas meskipun pertubuhan bukan kerajaan (NGO) luar negara menuduh aktiviti hutan di negeri ini memberi kesan buruk terhadap alam sekitar dan haiwan liar. Menteri Perancangan dan Pengurusan Sumber Kedua Datuk Amar Awang Tengah Ali Hasan yang tidak menyatakan nilai eksport produk perकayuan berkata, Jepun masih mengimport dari Sarawak meskipun negara tersebut mempunyai syarat-syarat ketat.

“Amalan pengurusan lestari hutan yang kita gunakan sejak beberapa tahun lepas telah meyakinkan Pertubuhan Kayu-Kayan Tropika Antarabangsa (ITTO) tentang keprihatinan kita menjaga alam sekitar,” katanya pada pelancaran Hari Perhutanan Sedunia di Taman Negara Similajau dekat sini, semalam.

Menjelaskan perkara yang sama, Timbalan Setiausaha Tetap Kementerian Perancangan dan Pengurusan Sumber Datu Len Talif Salleh berkata, NGO yang berusaha mencemar imej Sarawak tidak mempunyai pengaruh kuat. “NGO-NGO ini boleh dianggap ‘nyamuk’ yang tidak mampu mempengaruhi pasaran di negara pengimport produk perकayuan,” katanya.

Bagaimanapun, tambah Len Talif, usaha menjelaskan dasar perhutanan Sarawak di negara-negara luar wajar diteruskan dan dipergiat. “Jika dibiarkan

tindakan NGO mengaitkan kita dengan kemusnahan hutan, kita khawatir ia akan menjejaskan dalam jangka masa panjang,” kata Len Talif.

Awang Tengah berkata, NGO-NGO luar negara adalah tidak tepat apabila mendakwa Sarawak tidak mengamalkan pengurusan hutan lestari. Media di Barat katanya, menggambarkan seolah-olah Sarawak tidak mempunyai hutan lagi dan semua bukit digondolkan akibat aktiviti pembalakan berleluasa.

Katanya, media turut menghebahkan hidupan liar seperti orang utan semakin pupus setelah hilang habitat akibat hutan ditebang bagi membuka ladang kelapa sawit. “Tuduhan ini tidak berlandaskan realiti sedangkan Sarawak masih diliputi hutan kira-kira 84 peratus daripada 12.4 juta hektar keluasan negeri ini,” katanya. Malah, ujarnya, Sarawak turutewartakan beberapa kawasan sebagai Taman Negara dan Sanktuari Hidupan Liar bagi mengekalkan habitat orang utan serta flora dan fauna yang lain.

Awang Tengah berkata lagi, antara langkah memastikan kesinambungan sumber hutan, kerajaan mewujudkan program penanaman ladang hutan dengan sasaran 1.3 juta hektar pada 2020. Program itu membabitkan pemberian 42 Lesen Ladang Hutan kepada syarikat swasta.

Sementara itu, Hari Perhutanan Sedunia tersebut dianjurkan bersama Kementerian Perancangan dan Pengurusan Sumber, Jabatan Hutan, Sarawak Forestry Corporation (SFC), Perbadanan Kemajuan Perusahaan Kayu Sarawak (PUSAKA), Harwood Timber Sdn Bhd, Sarawak Planted Forest dan Persatuan Kayu-Kayan Sarawak (STA). Dengan tema ‘Hutan Untuk Komuniti,’ ia diadakan dengan tujuan memupuk kesedaran dan peranan masyarakat dalam usaha pemeliharaan hutan, pembangunan dan pengurusan mapan.

Hadir sama pada majlis tersebut, Menteri Muda Perancangan dan Pengurusan Sumber Naroden Majais, Menteri Muda Pelancongan Datuk Talib Zulpilip, Menteri Muda Kemudahan Awan Dr Stephen Rundi Utom, Residen Bintulu Ismail Mohd Anis dan Pengurus Besar PUSAKA Datu Sarudu Hoklai.

Read more: <http://www.theborneopost.com/2011/03/23/>